

Slavitud y Fortalesa na Aruba

Dia 29 di october ultimo a habri na Museo Arqueologico Nacional Aruba – MANA un exposicion cu ta enfoca riba slavitud na Aruba y papel di Hulanda colonial den slavitud comercial.

Den e exposicion ta comparti informacion tocante e slavitud “cora” - di Indjannan/indigenanan na Aruba. Esaki a cuminsa rond di 1515 tempo cu e colonizador Spaño a captura gran parti di e Indjannan cu tabata biba na Aruba y cu a ser hiba Hispañola como catibo pa traha den minanan. Danki na Archivo Nacional Aruba por comparti e storia real di e catibo Thomas cu a protesta contra su trato inhusto. Ademá di obhe-tonan relaciona cu slavitud na Aruba, cu cooperacion di Fundacion Museo Arubano, ta presenta e documentario Francisca & Eugenio. Un documentario impactante traha door di Rebecca Roos Productions cu ta conta e historia di shete generacion di famia Ecury. Un historia di un famia cu origen di catibo cu a bira un famia exitoso y a demostra fortaleza pa supera y adapta na cambionan. Tin publicacionnan tocante slavitud na Aruba cu ta ser exhibi, pa cortesia di Biblio-



teca Nacional Aruba. Otro publicacionnan di personanan priva por ser consulta den e skina di reflexion.

E papel di Hulanda colonial den slavitud comercial ta ser ilustra riba 10 poster di Rijksmuseum cu storianan real di personanan cu a ser esclavisa of tabata doño di personanan esclavisa. E storianan aki ta di Caribe Hulandes, Brasil, Surinam, Sur-Africa y Asia. Rijksmuseum a enfoca pa prome biaha riba slavitud di e periodo colonial Hulandes di siglo 17 te siglo 19. E posternan ta ilustra 250 aña di historia durante cua a considera hende un obheto cu ta propiedad di otro persona. E papel di ‘West-Indische

Compagnie’ y di ‘Verenigde Oost Indische Compagnie’ den slavitud colonial Hulandes ta ser explora.

E posternan di Rijksmuseum ta forma un exposicion viahero cu a ser presenta internacionalmente via Nacionnan Uni y UNESCO. Cu cooperacion di UNESCO Aruba y diferente aliado e exposicion ta recorriendo nos isla. A present’e comienso di e luna aki na Biblioteca Nacional San Nicolas y despues el a bay Educampus. Actualmente e ta na MANA y na november e lo sigui biaha pa Scol di Arte y Archivo Nacional Aruba. Cada anfitrión ta scoge su manera di adapta y presenta e exposicion aki

door di cua e ta ‘crece’. MANA ta gradici UNESCO Aruba y UNOCA pa a haci e exposicion aki posibel. Un danki grandi na Ministerio di Finanzas y Cultura pa sostene MANA pa e apertura di e exposicion y na nos aliadonan di e proyecto aki ANA, BNA, Scol di Arte y Educampus, y FMA pa fia algun artefactonan historico. Tambe ta gradici Sra. Celia Thiel cu a contribui gratuitamente cu un publicacion y dos grabacion riba CD di canticanan riba tambu di su proyecto

Patrimonio di Aruba, y Sr. Nelson Thiel pa fia su kalender di instrumentonan di Aruba.

E exposicion di slavitud lo keda na MANA te dia 19 di november. Haci uzo di e oportunidad aki pa haya mas conocimiento di Aruba su historia y específicamente di un tema cu apenas nos ta cuminsa explora como comunidad. MANA ta situa na Schelpstraat 42 y ta habri pa público di 9’or di mainta te 5’or di atardi. Entrada ta a base di donacion boluntario.



A gradua di Universidad di Aruba, Genisha Thijzen



Dia 24 di oktober 2024, a gradua na e Facultad di Ley na Universidad di Aruba, Genisha Thijzen.

El a gradua defendiendo su tesis titula: “Privacy en de Nieuwsmedia op Aruba: Een onderzoek naar de privacyrechten van overleden personen en hun nabestaanden in het kader van nationale wetgeving en internationale wetgeving”

Miembronan di e comision di examen tawata:

- mr. dr. Chun Luk
- mr. dr. Benedicta Deogratias
- mr. Brechtje Huiskes

Universidad di Aruba ta felicita Genisha Thijzen cu su logro.

Francine Pieterella a gradua como Bachelor den Organization, Governance and Management (OGM)

Recientemente, Francine Pieterella a defende su tesis exitosamente y a obtene e titulo di ‘Bachelor of Arts’ for di e programa Organization, Governance and Management, Facultad di Arte y Ciencia. Francine a defende su tesis “Navigating the Path to Sustainable Medical Waste Management in Aruba: Unveiling Challenges and Solutions” dilanti di e comision di graduacion cu tawata consisti di dr. Luc Alofs, Nurianna Arias, MSc y Francielle Lacle, MSc.

Ademá tabata presente decano di Facultad di Arte y Ciencia, Salys Sutlan, Ph.D., famia y invitado di Francine, docente di Universidad di Aruba y colega di estudio.

Francine a investiga con lo por implementa un sistema di manejo di desperdicio medico mas eficiente na Aruba, con-



siderando e escala y volumen di e desperdicio, limitacion financiero, ley, conocimiento y conscientisacion riba e tema. Francine a conduci un investigacion cualitativo unda cu dos grupo a participa na e entrevistanan; compania of clinica cu ta genera desperdicio medico y algun departamento di Gobierno concerni. Un di e recomendacionnan ta pa bin cu un ley cu ta indica específicamente kico desperdicio medico ta encera y con pa maneha esaki. Ademá ta recomenda pa continuamente duna training y tayer na e grupo di generado

di desperdicio medico.

Ta gradici e docentenan di e departamento di OGM y profesional cu a yuda of guia Francine como estudiante. Tambe ta gradici tur esnan na y pafo di Universidad di Aruba cu a contribui na un manera of otro na e acontecimiento aki.

Pa mas informacion tocante e estudio OGM, bishita e website di Universidad di Aruba na <http://www.ua.aw/ogm>, e pagina di Facebook @UniversityofArubaOGM y e pagina di Instagram @ogm_ua.